

**LUTRIJA BOSNE I HERCEGOVINE d.o.o.Sarajevo  
NADZORNI ODBOR**

Na osnovu člana 22. i člana 30. Zakona o igrama na sreću (“Službene novine FBiH”, broj 48/15 i 60/15) i člana 22. Statuta Lutrije Bosne i Hercegovine d.o.o. Sarajevo (“Službene novine FBiH”, broj 95/15), Nadzorni odbor Lutrije Bosne i Hercegovine na sjednici održanoj dana 11.10.2021. godine, donio je

**P R A V I L A  
IGARA NA SREĆU TV TOMBOLA BINGO 15/90, ČETVORKA  
I BINGO JOKER**

**1.OPŠTE ODREDBE**

**Član 1.**

Ovim pravilima reguliše se: naziv i sjedište Priređivača, naziv, vrijeme trajanja i područje primjene igara; uslovi za učestvovanje u igrama na sreću; pojedinačna cijena igara; ukupna vrijednost uplate pojedinih kola igara; fondovi dobitaka, visina fonda dobitaka i vrste dobitaka; opis pomoćnog listića i potvrde; priređivanje igara na sreću putem interneta; način, postupak i nadzor izvlačenja, odnosno utvrđivanja dobitaka; način objavljivanja iznosa uplate, osnovica za utvrđivanje fondova dobitaka, fonda dobitaka i rezultata igre; privremeni izvještaj, prigovori, konačan izvještaj; način i rok isplate dobitaka; način upoznavanja igrača sa ovim pravilima; postupak u slučaju otkazivanja izvlačenja; krajnji rok uplate za učestvovanje u igrama; porez na dobitke i prijelazne i završne odredbe.

**Član 2.**

TV Tombola Bingo 15/90, Četvorka i Bingo Joker su klasične igre na sreću u kojima učestvuje veći broj učesnika sa namjerom da budu jedini ili djelimični dobitnici unaprijed definisanog fonda dobitaka i u kojima se izvlačenje brojeva obavlja putem bubnja.

**Član 3.**

Ova pravila predstavljaju osnov za zaključivanje ugovora o učestvovanju u igri TV Tombola Bingo 15/90, Četvorka i Bingo Joker.

Ugovor iz stava 1. ovog člana zaključuje se između Lutrije Bosne i Hercegovine d.o.o. Sarajevo, kao Priređivača (u daljem tekstu: Priređivač) i učesnika u igri kao igrača, prihvatanjem opštih uslova propisanih ovim pravilima, po slobodno izraženoj volji igrača, činom uplate igre na sreću.

Uplata u igrama na sreću se dokazuje posjedovanjem potvrde o uplati.

**Član 4.**

Za obaveze prema igračima, u skladu sa odredbama ovih pravila odgovara Priređivač svim svojim sredstvima.

Za isplatu dobitaka iz stava 1. ovog člana, u skladu sa članom 15. Zakona o igrama na sreću jamči Federacija Bosne i Hercegovine.

## **2.NAZIV I SJEDIŠTE PRIREĐIVAČA**

### **Član 5.**

Priređivač igara na sreću TV Tombola Bingo 15/90, Četvorka i Bingo Joker je Lutrija Bosne i Hercegovine d.o.o. Sarajevo sa sjedištem u Sarajevu, ul. Mehmeda Spahe broj 11, registrovana kod nadležnog suda, čija je djelatnost priređivanje svih vrsta igara na sreću.

## **3.NAZIV, VRIJEME TRAJANJA I PODRUČJE PRIMJENE IGARA**

### **Član 6.**

Igre TV Tombola Bingo 15/90, Četvorka i Bingo Joker priređuje se tokom cijele godine po kolima. Redovna kola se održavaju jednom sedmično i to petkom, a vanredna kola u skladu sa odlukom direktora Lutrije Bosne i Hercegovine (u daljem tekstu: direktor) i to na području Federacije Bosne i Hercegovine i Brčko Distrikta.

## **4.TV TOMBOLA BINGO 15/90**

### **Član 7.**

TV Tombola Bingo 15/90 je brojčana igra sa izvlačenjem brojeva, od 1 do 90, putem bubnja, u kojoj se unaprijed utvrđuje visina fonda dobitaka i njegova raspodjela.

### **Član 8.**

Uplate za igru TV Tombola Bingo 15/90 primaju se putem on-line sistema upotrebom pomoćnih listića.

Načini ispisa kombinacija brojeva, odnosno otiska drugih podataka na potvrdi pobje su uređeni članom 46. i 47. ovih pravila.

### **Član 9.**

Izvlačenje brojeva obavlja se putem bubnja u kojem je smješteno 90 kuglica s ispisanim brojevima, od broja 1 do broja 90.

## **4.1. Uslovi za učestvovanje u igri TV Tombola Bingo 15/90**

### **Član 10.**

U igri TV Tombola Bingo 15/90 učestvuju samo kombinacije brojeva koje su ispisane na potvrdama o uplati (u daljem tekstu: potvrda).

Ako postoje neslaganja između kombinacija ispisanih na pomoćnom listiću i potvrdi, važi isključivo zapis ispisanih na potvrdi.

#### **Član 11.**

Igrač učestvuje u onom kolu igre TV Tombola Bingo 15/90 za koje je izvršena uplata, saglasno sa ovim pravilima.

#### **Član 12.**

Dokaz za učestvovanje u igri TV Tombola Bingo 15/90 kod on-line sistema isključivo je potvrda.

#### **Član 13.**

Uplata on-line sistemom počinje očitavanjem pomoćnog listića, a završava izdavanjem potvrde.

#### **Član 14.**

Nakon izvršene uplate, igraču se izdaje potvrda koja mora sadržavati sve podatke navedene u ovim pravilima.

#### **Član 15.**

Potvrde koje nemaju podatke određene u ovim pravilima su nevažeće.

Igrač u igri TV Tombola Bingo 15/90 dužan je pri uplati provjeriti ispravnost potvrde u skladu sa članom 47. ovih pravila.

U protivnom, naknadni prigovori se ne uvažavaju.

### **4.2. Pojedinačna cijena igre**

#### **Član 16.**

Cijena uplate listića sa šest kombinacija redovnog kola TV Tombole Bingo 15/90 iznosi 2,00 KM, a za vanredno kolo cijena iznosi 3,00 KM.

### **4.3. Ukupna vrijednost uplate pojedinog kola igre TV Tombola Bingo 15/90**

#### **Član 17.**

Uplatu pojedinog kola igre TV Tombola Bingo 15/90 čini iznos primljenih uplata za učestvovanje u pripadajućem kolu igre TV Tombola Bingo 15/90.

Nakon zaključenja uplate TV Tombola Bingo 15/90, a prije izvlačenja brojeva određenog kola igre TV Tombola Bingo 15/90, snimak uplata na DVD-u pohranjuje se u trezor Komisije za utvrđivanje dobitaka.

### **4.4. Osnovica za utvrđivanje fonda dobitaka**

#### **Član 18.**

Osnovica za utvrđivanje fonda dobitaka u klasičnim igrama na sreću TV Tombola Bingo 15/90, Četvorka i Bingo Joker utvrđuje se od iznosa uplate, koju čini ukupna vrijednost uplate za učestvovanje u svakoj pojedinoj igri na sreću umanjenu za iznos od 10% na ime naknade za priređivanje igre koja se uplaćuje u budžet FBiH.

#### 4.5. Visina fonda dobitaka i vrste dobitaka

##### Član 19.

Fond dobitaka u pojedinom kolu igre TV Tombola Bingo 15/90 čini iznos od 63% osnovice utvrđene u članu 18. ovih pravila.

Iznos fonda dobitaka za pojedino kolo igre TV Tombole Bingo 15/90 mora biti objavljen prije početka TV izvlačenja brojeva.

U igri TV Tombola Bingo 15/90 postoji četiri vrsta dobitaka i to:

- dobitak prve vrste - JackPot ili Bingo;
- dobitak druge vrste - deset pogodaka;
- dobitak treće vrste - pet pogodaka;
- dobici u igri igrač-gost „Šansa više”.

##### Član 20.

Fond dobitaka se dijeli na:

- Fond za igru igrač-gost, u fiksnom iznosu od 2.000,00 KM. Razlika do ukupne vrijednosti ostvarenih dobitaka tekućeg kola u igri igrač-gost namirit će se iz fonda neisplaćenih dobitaka.

Ostatak fonda se dijeli kako slijedi:

- Bingo ..... 54%
- Deset pogodaka ..... 15%
- Pet pogodaka ..... 31%

Iznos fonda dobitaka, za svaku vrstu dobitaka, se dijeli na jednake iznose, kako bi se utvrdila pojedinačna vrijednost dobitaka, zavisno o ukupnom broju dobitaka te vrste.

U slučaju kada akumulirani JackPot u TV Tomboli Bingo pređe iznos od 1.000.000,00 KM, dio akumuliranog JackPota se može koristiti za uvećanje fonda dobitaka tekućeg kola.

Odluku o raspodjeli dobitaka u igri TV Tombola Bingo na način naveden u prethodnom stavu ovog člana donosi Nadzorni odbor Lutrije BiH, na prijedlog direktora.

#### **Dobitak prve vrste-JackPot ili Bingo**

Ako je na jednoj od šest kombinacija ispisanih na potvrdi o uplati pogodeno svih petnaest do tada izvučenih brojeva, počevši od:

- 15-tog (petnaestog) izvučenog broja do zaključno sa 33-im (tridesettrećim) izvučenim brojem dobitak je JackPot;
- 34-og (tridesetčetvrtog) izvučenog broja, do kraja izvlačenja, dobitak je 75% fonda Bingo tekućeg kola (u daljem tekstu: Bingo 34+), a ostalih 25% se akumulira u fond za JackPot.

U slučaju kada akumulirani JackPot pređe iznos od 1.000.000,00 KM, dobitak

Bingo 34+ čini 90% fonda dobitaka Bingo tekućeg kola, a ostatak od 10% se akumulira u fond za JackPot.

### **Dobitak druge vrste-10 pogodaka**

Dobitak druge vrste-deset pogodaka, ostvaruje se zaključno sa 33-im (tridesettrećim) izvučenim brojem, ako je pogođeno svih deset brojeva u bilo koja dva reda jedne kombinacije ispisane na potvrdi.

U slučaju da je vrijednost pojedinačnog dobitka druge vrste veća od vrijednosti pojedinačnog dobitka prve vrste (Bingo), vrijednost dobitaka se utvrđuje na način da se zbroje fondovi dobitaka prve i druge vrste, te podjele sa ukupnim brojem dobitaka prve i druge vrste. Ako se do 33-eg (tridesettrećeg) izvučenog broja ne ostvari dobitak druge vrste, fond dobitaka druge vrste se prenosi u fond dobitaka treće vrste.

### **Dobitak treće vrste-5 pogodaka**

Dobitak treće vrste-pet pogodaka, ostvaruje se zaključno sa 33-im (tridesettrećim) izvučenim brojem, ako je pogođeno svih pet brojeva u bilo kojem redu jedne kombinacije ispisane na potvrdi.

### **Učešće u igri igrač-gost „Šansa više“**

Svi imaoći potvrde TV Tombola Bingo 15/90 mogu učestvovati u igri igrač-gost “Šansa više” (u daljem tekstu: SMS igrač), putem SMS poruke, na način da u poruci, upućenoj na predviđeni broj telefona Lutrije BiH, bude ispisani serijski broj pomoćnog listića ispisani na potvrdi o uplaćenju TV Tomboli Bingo za tekuće kolo. Putem poruke se može ispisati samo jedan broj potvrde.

Izvlačenje dobitnika ove igre vrši se slučajnim odabirom 3 (tri) dobitnika u tekućem kolu, koji će učestvovati isključivo u narednoj emisiji TV Tombola Bingo, uz prezentaciju potvrde o uplati.

Ukoliko je SMS igrač došao u studio, a poslije nije u mogućnosti iz bilo kog razloga izvlačiti dobitke, za njega to radi voditelj emisije. Ukoliko voditelj emisije u prvom pokušaju izvuče dobitak od 700,00 KM, voditelj će ponoviti izvlačenje. Dobitak koji bude ostvaren nakon drugog pokušaja voditelja se smatra konačnim. Ukoliko voditelj nakon prvog pokušaja ostvari dobitak veći od 700,00 KM taj dobitak se smatra konačnim. Voditelj emisije bira SMS igrača za naredno kolo ukoliko to igrač nije u mogućnosti da učini.

Ukoliko SMS igrač nije došao u studio dobitak se ne izvlači, voditelj emisije bira SMS igrača za naredno kolo. Ukoliko je ukupna vrijednost izvučenih dobitaka manja od 2.000,00 KM, razlika do navedenog iznosa se prenosi u fond neisplaćenih dobitaka.

Ukoliko SMS igrač ne posjeduje original potvrdu TV Tombole Bingo (zbog gubitka ili uništenja iste), može učestvovati u igri, na osnovu pismenog zahtjeva uz provjeru od strane Odjeljenja EOP-a da je poruka poslana sa broja mobilnog telefona navedenog u zahtjevu.

U TV studiju se nalazi kolo sreće na kojem je ispisano 18 fiksnih dobitaka i to: 1 x 5.000,00 KM, 1 x 3.000,00 KM, 3 x 2.000,00 KM, 4 x 1.000,00 KM, 3 x 900,00 KM, 3 x 800,00 KM i 3 x 700,00 KM.

Redosljed po kojem SMS igrači izvlače dobitke u skladu je sa redosljedom po kojem su izvučeni u prethodnom kolu.

Početno polje svakog od SMS igrača predstavlja polje na kojem je ispisan najveći dobitak u igri, odnosno dobitak od 5.000,00 KM.

Puni krug se smatra kada se kolo sreće zaustavi na početnom polju.

SMS igrač treba da zavrta kolo sreće koje mora obići minimalno dva puna kruga da bi se ostvario dobitak. Nakon završetka igre svakog od SMS igrača, voditelj emisije je dužan da vrati kolo sreće na početno polje, odnosno na polje na kojem je ispisan dobitak od 5.000,00 KM.

Ukoliko se kolo sreće zaustavi prije nego što obiđe dva puna kruga, voditelj emisije je dužan da objasni SMS igraču da se dobitak ostvaruje nakon dva kruga i da vrati kolo sreće na početno polje. U ovom slučaju SMS igrač treba da ponovi igru.

Polje na kojem se kolo zaustavi nakon što obiđe minimalno dva puna kruga predstavlja iznos dobitka kojeg je SMS igrač ostvario. Nakon što se kolo sreće zaustavi, voditelj emisije pita SMS igrača da li želi da zadrži ostvareni dobitak ili želi da rizikuje i da pokuša ponovo. Ukoliko SMS igrač odluči da ponovi svoju igru, kolo sreće se vraća na početno polje, te polje na kojem se kolo sreće zaustavi nakon što obiđe minimalno dva puna kruga predstavlja konačni dobitak SMS igrača.

Ukoliko se strelica koja pokazuje iznos dobitka na kolu sreće zaustavi između dva polja na način da komisija ne može tačno odrediti koji je iznos dobitka SMS igrač ostvario, u tom slučaju SMS igraču se priznaje dobitak u većem iznosu.

Svaki SMS igrač ima mogućnost da ostvari bilo koji od dobitaka koji su ispisani na kolu sreće.

U slučaju da prije početka ili u toku igre "Šansa više" nastane kvar na kolu sreće, igra se nastavlja izvlačenjem dobitaka putem 18 koverata u kojima se nalaze fiksni dobitci sa kola sreće. Jednom izvučena koverta se vraća i učestvuje u daljem izvlačenju.

Po završetku igre, SMS igrač bira novog SMS igrača, za naredno kolo i tim činom završava svoju igru.

SMS igrač će se izvlačiti iz baze primljenih SMS poruka za tekuće kolo.

Svi igrači koji pošalju SMS za učešće u igri igrač-gost "Šansa više" ili pošalju SMS za Vanredna kola TV Tombole Bingo i budu registrovani u bazi poslanih SMS poruka pristaju na prijem SMS obavještenja od strane Lutrije BiH.

## Član 21.

Priredivač garantuje JackPot u iznosu od 100.000,00 KM.

Iznos iz stava 1. ovog člana se može mjenjati odlukom direktora.

Ako se dobitak JackPot ne ostvari, a ostvaren je dobitak Bingo 34+, neostvareni dio fonda dobitaka Binga tekućeg kola pridodaje se i akumulira isključivo u fond JackPota.

## Član 22.

Ako se JackPot ostvari počevši od 15 (petnaestog) izvučenog broja do zaključno 33-im (tridesettrećim) izvučenim brojem, izvlačenje se završava i utvrđuju se dobitci prve, druge i treće vrste.

Ako se JackPot ne ostvari zaključno sa 33-im (tridesettrećim) izvučenim brojem, tada se zaključuje broj dobitaka druge i treće vrste.

Izvlačenje se nastavlja dok se ne ostvari dobitak prve vrste kako slijedi:

- Bingo 34+, počevši od 34-og (tridesetčetvrtog) izvučenog broja do ostvarenja tog dobitka.

#### **4.6. Zadnje redovno kolo igara na srećuTV Tombole Bingo 15/90, Četvorka i Bingo Joker u mjesecu**

##### **Član 23.**

Svakog mjeseca u zadnjem redovnom kolu igre TV Tombola Bingo 15/90, kompletan fond dobitaka tog kola će biti podjeljen igračima, a izvlačenje će se završiti sa 33. izvučenim brojem.

Direktor donosi Odluku o nazivu i načinu priređivanja i eventualnim dodatnim dobitcima zadnjeg kola u mjesecu.

#### **4.7. Vanredna kola igara na sreću TV Tombola Bingo 15/90, Četvorka i Bingo Joker**

##### **Član 24.**

Direktor donosi Odluku o priređivanju vanrednog kola ovih igara na sreću.

##### **Član 25.**

Odluka iz člana 24. pravila sadrži: vrijeme prodaje vanrednog kola, cijenu pomoćnog listića sa šest kombinacija, raspodjelu fonda i vrste dobitaka vanrednog kola, vrijeme izvlačenja dobitaka.

### **5. ČETVORKA**

##### **Član 26.**

Igra na sreću Četvorka je brojčana igra sa izvlačenjem četiri broja dobitne kombinacije putem bubnja, u kojem se unaprijed utvrđuje visina fonda dobitaka i njegova raspodjela.

Igrač učestvuje u igri uplatom igre TV Tombola Bingo 15/90, te obilježavanjem znakom „X“ jednog od tri polja sa oznakama 1, 2, 3 ispod riječi “Igram Četvorku”, ili usmenim zahtjevom za odigravanje jedne, dvije ili tri kombinacije igre Četvorka i uplatom Četvorka brojeva ispisanih na izdatoj potvrdi.

Ukoliko igrač znakom „X“ obilježi broj 1 ispod riječi “Igram Četvorku”, učestvuje u igri Četvorka sa kombinacijom 4 broja koji su otisnuti ispod riječi “Igram Četvorku”.

Ukoliko igrač znakom „X“ obilježi broj 2 ispod riječi “Igram Četvorku”, učestvuje u igri Četvorka sa dvije kombinacije od po 4 broja: prvom kombinacijom koja je otisnuta ispod riječi “Igram Četvorku” i drugom kombinacijom koju generiše softver slučajnim odabirom (quick pick).

Ukoliko igrač znakom „X“ obilježi broj 3 ispod riječi “Igram Četvorku”, učestvuje u igri Četvorka tri kombinacije od po 4 broja: prvom kombinacijom koja je otisnuta ispod riječi “Igram Četvorku”, te drugom i trećom kombinacijom koju generiše softver slučajnim odabirom (quick pick).

## **Član 27.**

Igračem u igri Četvorka smatra se lice koje posjeduje potvrdu pod uslovom da je njen sadržaj zapisan na neizbrisivi optički disk, prije izvlačenja brojeva dobitne kombinacije igre TV Tombola Bingo 15/90 i igre Četvorka, te da su ispisi na potvrdi i zapis na optičkom disku istovjetni.

### **5.1. Naziv, opis i vrijeme trajanja igre**

## **Član 28.**

Izvlačenje brojeva za igru Četvorka obavlja se tako što se iz bubnja u kojem se nalaze kuglice sa brojevima od 1 (jedan) do 54 (pedeset i četiri) izvuku 4 (četiri) različita broja. Tačna pozicija izvučenih brojeva određuje vrste pojedinih dobitaka u igri Četvorka.

## **Član 29.**

Igra Četvorka priređuje se trajno po kolima, kao dodatna i neobavezna igra uz igru TV Tombola Bingo 15/90 i Bingo Joker, u pravilu jednom sedmično, petkom.

### **5.2. Uslovi za učešće u igri Četvorka**

## **Član 30.**

U igri Četvorka učestvuju potvrde o uplati igre TV Tombola Bingo, uplaćene za tekuće kolo, pod uslovom da potvrda sadrži odštampane jednu, dvije ili tri kombinacije od po četiri broja u igri Četvorka.

Nakon uplate kombinacija u igri Četvorka igrač je obavezan provjeriti sadržaj potvrde.

### **5.3. Pojedinačna cijena igre**

## **Član 31.**

Cijena za učešće u igri Četvorka u redovnom kolu iznosi 1,00 KM po svakoj odigranoj kombinaciji u igri Četvorka.

Priređivač može odlukom direktora u vanrednom kolu odrediti posebnu cijenu za učešće u igri Četvorka.

### **5.4. Visina fonda i vrste dobitaka**

## **Član 32.**

Fond dobitaka u igri Četvorka iznosi 63% osnovice za utvrđivanje fonda dobitaka ove igre na sreću određene u skladu sa članom 18. ovih pravila, a koju čini ukupna vrijednost uplate za učestvovanje u igri Četvorka umanjena za iznos od 10% na ime naknade za priređivanje igre.



### Član 33.

U igri Četvorka postoji osam (8) vrsta dobitaka:

- dobitak VIII vrste: JEDINICA,  
ako je pogođen jedan od 4 izvučena broja nezavisno od njegove pozicije u redosljed u brojeva dobitne kombinacije na izvlačenju.
- dobitak VII vrste: JEDINICA PLUS,  
ako je pogođen jedan od 4 izvučena broja na tačnoj poziciji i u tačnom redosljed u brojeva dobitne kombinacije na izvlačenju (na prvoj, drugoj, trećoj ili četvrtoj poziciji dobitne kombinacije).
- dobitak VI vrste: DVOJKA,  
ako su pogođena dva od 4 izvučena broja na bilo kojim pozicijama i u bilo kom redosljed u odnosu na redosljed brojeva u izvlačenju.
- dobitak V vrste: DVOJKA PLUS,  
ako su pogođena dva od 4 izvučena broja na tačnim pozicijama i u tačnom redosljed u brojeva dobitne kombinacije na izvlačenju.
- dobitak IV vrste: TROJKA,  
ako su pogođena tri od 4 izvučena broja na bilo kojim pozicijama i u bilo kom redosljed u odnosu na redosljed brojeva u izvlačenju.
- dobitak III vrste: TROJKA PLUS,  
ako su pogođena tri od 4 izvučena broja na tačnim pozicijama i u tačnom redosljed u brojeva dobitne kombinacije na izvlačenju.
- dobitak II vrste: ČETVORKA,  
ako su pogođena sva četiri izvučena broja na bilo kojim pozicijama i u bilo kom redosljed u odnosu na redosljed brojeva u izvlačenju.
- dobitak I vrste: ČETVORKA PLUS,  
ako su pogođena sva četiri izvučena broja na tačnim pozicijama i u tačnom redosljed u brojeva dobitne kombinacije na izvlačenju.

Dobitak više vrste isključuje dobitak niže vrste u svakoj pojedinačnoj kombinaciji igre Četvorka.

### Član 34.

Vrijednosti dobitaka VIII - V vrste su fiksni:

- Dobitak VIII vrste (JEDINICA) 1,00 KM
- Dobitak VII vrste (JEDINICA PLUS) 2,00 KM
- Dobitak VI vrste (DVOJKA) 5,00 KM
- Dobitak V vrste (DVOJKA PLUS) 25,00 KM

Vrijednosti dobitaka IV i III vrste su garantovani:

- Dobitak IV vrste (TROJKA) 50,00 KM
- Dobitak III vrste (TROJKA PLUS) 500,00 KM

Vrijednosti dobitaka IV i III vrste mogu biti uvećani u slučaju opisanom u članu 34. stav 10. ovih pravila.

Vrijednosti dobitaka II i I vrste su varijabilni:

- Vrijednost dobitak II vrste (ČETVORKA) utvrđuje se na način da se fond dobitaka II vrste podijeli sa utvrđenim brojem dobitaka te vrste u pojedinom kolu.
- Vrijednost dobitak I vrste (ČETVORKA PLUS) utvrđuje se na način da se fond dobitaka I vrste podijeli sa utvrđenim brojem dobitaka te vrste u pojedinom kolu.

Fondovi dobitaka se formiraju na sljedeći način:

- Fond dobitaka VIII vrste (JEDINICA)= broj dobitaka VIII vrste x 1,00 KM
- Fond dobitaka VII vrste (JEDINICA PLUS)= broj dobitaka VII vrste x 2,00 KM
- Fond dobitaka VI vrste (DVOJKA)= broj dobitaka VI vrste x 5,00 KM
- Fond dobitaka V vrste (DVOJKA PLUS)= broj dobitaka V vrste x 25,00 KM
- Fond dobitaka IV vrste (TROJKA)= broj dobitaka IV vrste x 50,00 KM
- Fond dobitaka III vrste (TROJKA PLUS)= broj dobitaka III vrste x 500,00 KM
- Fond dobitaka II vrste (ČETVORKA)= (Ukupan fond dobitaka - zbir fondova dobitaka od III do VIII vrste) x 88%
- Fond dobitaka I vrste (ČETVORKA PLUS)= (Ukupan fond dobitaka - zbir fondova dobitaka od III do VIII vrste) x 12%

Ukoliko se ne ostvari dobitak II vrste, taj fond se akumulira.

Ukoliko se ne ostvari dobitak I vrste, taj fond se akumulira.

Garantovani fond za dobitke II vrste (ČETVORKA) iznosi 5.000,00 KM.

Garantovani fond za dobitke I vrste (ČETVORKA PLUS) iznosi 50.000,00 KM.

## Član 35.

Ukoliko akumulirani fond dobitaka II vrste (ČETVORKA) dostigne iznos od 10.000,00 KM, sredstva koja prelaze akumulaciju od 10.000,00 KM u fondu za dobitak II vrste se priključuju fondovima dobitaka III i IV vrste (TROJKA PLUS i TROJKA) u razmjeri 50% : 50%.

Ukoliko se u tom kolu ne ostvari dobitak III vrste (TROJKA PLUS), a ostvari dobitak IV vrste (TROJKA), sredstva namijenjena za uvećanje fonda dobitaka III vrste, priključuju se fondu dobitaka IV vrste.

Ukoliko se u tom kolu ne ostvari dobitak IV vrste (TROJKA), a ostvari dobitak III vrste (TROJKA PLUS), sredstva namijenjena za uvećanje fonda dobitaka IV vrste, priključuju se fondu dobitaka III vrste.

Ukoliko se u tom kolu ne ostvare dobici III i IV vrste (TROJKA PLUS i TROJKA), sredstva namijenjena za uvećanje fondova ovih dobitaka, prenose se u fond dobitaka II vrste (ČETVORKA) za naredno kolo.

Ukoliko se ostvari dobitak I i/ili II vrste, a akumulacija ne dostigne iznos garantovanog fonda za dobitke I i II vrste, akumulirani fond dobitaka za naredno kolo će se umanjiti za nedostajući iznos sredstava i isti će se namiriti iz uplate narednih kola.

Ukoliko je zbir fondova dobitaka od III do VIII vrste veći od ukupnog fonda dobitaka, akumulirani fond dobitaka I vrste za naredno kolo će se umanjiti za iznos nedostajućih sredstava i isti će se namiriti iz uplate narednih kola.

Ukoliko je vrijednost dobitka više vrste niža od vrijednosti dobitka niže vrste, vrijednosti dobitaka obje vrste se utvrđuje na način da se ti fondovi zbrajaju i dijele sa ukupnim brojem dobitaka više i niže vrste.

## 6. JOKER

### Član 36.

Igra na sreću Bingo Joker je brojčana igra s izvlačenjem dobitnog petocifrenog broja putem bubnja, u kojoj se unaprijed utvrđuje visina fonda dobitaka i njegova raspodjela.

Uplatom igre TV Tombola Bingo 15/90, te obilježavanjem znakom „X“ jednog od tri polja (sa oznakom 1,2,3) ispod riječi igram Bingo Joker, ili usmenim zahtjevom za odigravanje jednog, dva ili tri broja igre Bingo Joker i uplatom Bingo Joker brojeva ispisanih na izdanoj potvrdi.

Ukoliko igrač znakom „X“ obilježi broj 1 ispod riječi igram Bingo Joker, učestvuje u igri Bingo Joker sa brojem koji je otisnut pored riječi Bingo Joker.

Ukoliko igrač znakom „X“ obilježi broj 2 ispod riječi igram Bingo Joker, učestvuje u igri Bingo Joker sa dva broja: prvim brojem koji je otisnut iznad riječi igram Bingo Joker i drugim brojem kojeg generiše softver slučajnim odabirom (quick pick).

Ukoliko igrač znakom „X“ obilježi broj 3 ispod riječi igram Bingo Joker, učestvuje u igri Bingo Joker sa tri broja: prvim brojem koji je otisnut iznad riječi

igram Bingo Joker, te drugim i trećim brojem koje generiše softver slučajnim odabirom (quick pick).

#### **Član 37.**

Igračem u igri Bingo Joker smatra se lice koje posjeduje potvrdu pod uslovom da je njen sadržaj zapisan na neizbrisivi optički disk, prije izvlačenja brojeva dobitne kombinacije igre TV Tombola Bingo 15/90 i igre Bingo Joker, te da su ispisi na potvrdi i zapis na optičkom disku istovjetni.

### **6.1. Naziv, opis i vrijeme trajanja igre**

#### **Član 38.**

U igri Bingo Joker pogađa se dobitni petocifreni broj pod nazivom Bingo Joker broj, koji se dobiva izvlačenjem po jednog broja iz svakog bubnja. U svakom bubnju nalaze se brojevi od 0 do 9.

#### **Član 39.**

Igra Bingo Joker priređuje se trajno po kolima, kao dodatna i neobavezna igra uz igru TV Tombola Bingo 15/90 i Četvorka, u pravilu jednom sedmično, petkom.

#### **Član 40.**

Izvlačenje brojeva za igru Bingo Joker obavlja se na način da Bingo Joker broj čini pet izvučenih brojeva iz pet bubnjeva, a gledajući s lijeva na desno, pri čemu:

- prvi izvučeni broj predstavlja desethiljaditu Bingo Joker broja;
- drugi izvučeni broj predstavlja hiljadu Bingo Joker broja;
- treći izvučeni broj predstavlja stoticu Bingo Joker broja;
- četvrti izvučeni broj predstavlja desetice Bingo Joker broja;
- peti izvučeni broj predstavlja jedinicu Bingo Joker broja.

### **6.2. Uslovi za učešće u igri Bingo Joker**

#### **Član 41.**

U igri Bingo Joker učestvuju potvrde o uplati igre TV Tombola Bingo 15/90, uplaćene za važeće kolo, pod uslovom da ista sadrži odštampana jedan, dva, ili tri Bingo Joker broja. Nakon uplate Bingo Joker broja igrač je obavezan provjeriti sadržaj potvrde.

### **6.3. Pojedinačna cijena igre**

#### **Član 42.**

Cijena za učešće u igri Bingo Joker iznosi 1,00 KM po svakom odigranom Bingo Joker broju.

## 6.4. Visina fonda i vrste dobitaka

### Član 43.

Fond dobitaka u igri Bingo Joker iznosi 63% fonda dobitaka ove igre na sreću utvrđenog u skladu sa članom 18. ovih pravila.

### Član 44.

U igri Bingo Joker postoji (5) pet vrsta dobitaka koji se ostvaruju u slučaju da je pogođeno 1 ; 2 ; 3 ; 4 ; 5 brojeva gledajući s desna na lijevo i to:

- **Bingo Joker 1**

Uplaćene potvrde za učešće u igri Bingo Joker čiji je posljednji jedan broj (broj na jediničnom mjestu) identičan sa brojem na jediničnom mjestu izvučenog Bingo Joker broja (pogođen jedan broj izvučenog Bingo Joker broja gledajući s desna na lijevo).

- **Bingo Joker 2**

Uplaćene potvrde za učešće u igri Bingo Joker čija su posljednja dva broja (broj na jediničnom i mjestu desetice) identični sa brojevima na jediničnom mjestu i mjestu desetice izvučenog Bingo Joker broja (pogođena dva broja izvučenog Bingo Joker broja gledajući s desna na lijevo).

- **Bingo Joker 3**

Sve uplaćene potvrde za učešće u igri Bingo Joker čija su posljednja tri (3) broja (broj na jediničnom mjestu, mjestu desetice i mjestu stotice) identični sa brojevima na jediničnom mjestu, mjestu desetice i stotice izvučenog Bingo Joker broja (pogođena tri broja izvučenog Bingo Joker broja gledajući s desna na lijevo).

- **Bingo Joker 4**

Sve uplaćene potvrde za učešće u igri Bingo Joker čija su posljednja četiri (4) broja (broj na jediničnom mjestu, mjestu desetice, stotice i mjestu hiljade) identični sa brojevima na jediničnom mjestu, mjestu desetice, stotice i hiljade izvučenog Bingo Joker broja (pogođena četiri broja izvučenog Bingo Joker broja gledajući s desna na lijevo).

- **Bingo Joker 5**

Sve uplaćene potvrde za učešće u igri Bingo Joker čijih su svih pet (5) brojeva (broj na jediničnom mjestu, mjestu desetice, stotice, hiljade i mjestu desetihiljadite) identični sa brojevima izvučenog Bingo Joker broja (pogođeno svih pet brojeva izvučenog Bingo Joker broja gledajući s desna na lijevo).

Fond dobitaka se dijeli na:

- Bingo Joker 5 ..... 10%
- Bingo Joker 4 ..... 8%
- Bingo Joker 3 ..... 17%
- Bingo Joker 2 ..... 32%
- Bingo Joker 1 ..... 33%

Ako u pojedinom kolu igre Bingo Joker nema dobitaka Bingo Joker 5, kompletan fond za tu vrstu dobitka se dodaje fondu dobitaka Bingo Joker 4.

Ako u pojedinom kolu igre Bingo Joker nema dobitaka Bingo Joker 5 i Bingo Joker 4, ili nema dobitka Bingo Joker 4, fond te vrste dobitka se dijeli u omjeru 50%:50% na dobitke Bingo Joker 3 i Bingo Joker 2.

Ako u pojedinom kolu igre Bingo Joker nema dobitaka Bingo Joker 5, Bingo Joker 4, Bingo Joker 3, ili samo Bingo Joker 4 i Bingo Joker 3, fond te vrste dobitaka se dijeli u omjeru 50%:50% na dobitke Bingo Joker 2 i Bingo Joker 1.

Ukoliko je vrijednost dobitka više vrste niža od vrijednosti dobitka niže vrste, vrijednosti dobitaka obje vrste se utvrđuje na način da se ti fondovi zbrajaju i dijele sa ukupnim brojem dobitaka više i niže vrste.

#### **Član 45.**

Iznos pojedinačnog dobitka utvrđuje se tako da se fond dobitaka namijenjen za taj dobitak podijeli ukupnim brojem ostvarenih dobitaka. Na svakom od uplaćenih brojeva može se ostvariti dobitak Bingo Joker broj.

Dobitak više vrste isključuje dobitak niže vrste za svaki pojedinačno uplaćeni Bingo Joker broj.

### **7. OPIS POMOĆNOG LISTIĆA I POTVRDE**

#### **Član 46.**

Pomoćni listić za igre TV Tombola Bingo 15/90, Četvorka i Bingo Joker pravougaonog je oblika, dimenzija 105 x 148 mm.

Pomoćni listić se sastoji od lica i naličja.

#### **a) Lice pomoćnog listića**

Lice pomoćnog listića za igre TV Tombola Bingo 15/90, Četvorka i Bingo Joker sadrži šest (6) kombinacije brojeva za igru TV Tombola Bingo 15/90.

Svaka se kombinacija sastoji od dvadesetsedam (27) polja poredanih u tri jednaka reda u kojima je otisnuto petnaest (15) različitih brojeva od 1 do 90, po pet brojeva u svakom redu i najmanje jednim brojem u svakom od 9 stupaca.

Osim navedenog, na pomoćnom listiću otisnuti su još slijedeći podaci:

- logotip Priređivača;
- logotip igre "TV BINGO";
- tekst: "APSOLUTNA ZABAVA!";
- logotip igre "ČETVORKA";
- otisnuta jedna kombinacija igre Četvorka uz mogućnost odabira iste, te druge i treće kombinacije ispod riječi „Igram Četvorku“;
- logotip igre "BINGO JOKER";
- otisnuta jedna Bingo Joker kombinacija uz mogućnost odabira iste, te druge i treće kombinacije ispod riječi „Igram Bingo Joker“ (za dodatnu igru);
- bar kod za serijski broj;
- broj serije (trocifreni broj);
- redni broj listića (sedmocifreni broj);
- kontrolni broj listića (dvocifreni broj);
- ugaoni markeri za mašinsko očitavanje listića i grafički kodovi listića.

## **b) Naličje pomoćnog listića**

Na naličju pomoćnog listića nalazi se prostor za reklamne poruke i obavještenja za igrače.

### **Potvrda o uplati**

#### **Član 47.**

Potvrda o uplati, gledajući odozgo prema dole, sadrži ove podatke:

- „Lutrija BiH“ d.o.o. (logo i naziv Priređivača);
- vrijeme upisa na serveru;
- tekst: „POTVRDA O UPLATI“;
- tekst: „TV BINGO“;
- broj važećeg kola, uplatni broj (operativni broj prodavača i redni broj potvrde);
- datum izvlačenja;
- serijski broj;
- tekst: „KOMBINACIJE“;
- ispis 90 različitih brojeva u šest kombinacije, svaka od 15 brojeva;
- eventualno kombinacija igre Četvorka;
- eventualno Joker broj;
- tekst: „Iznos“, iznos u KM;
- eventualno promotivni tekst;
- broj uplatnog mjesta, datum i vrijeme uplate i
- kontrolni kod u brojčanoj i bar kod verziji.

Serijski broj sadrži: broj serije (trocifreni broj), redni broj listića (sedmocifreni broj) i kontrolni broj listića (dvocifreni broj).

#### **Član 48.**

U jednom kolu igre TV Tombola Bingo 15/90, Četvorka i Bingo Joker ne mogu se pojaviti dvije iste kombinacije brojeva na istom listiću.

#### **Član 49.**

Uplate za učestvovanje u igri TV Tombola Bingo 15/90, Četvorka i Bingo Joker primaju se na uplatno prodajnim mjestima Priređivača, putem interneta i putem zastupnika.

## **8. PRIREĐIVANJE IGARA NA SREĆU PUTEM INTERNETA**

#### **Član 50.**

Uslovi za učestvovanje u igrama TV Tombola Bingo 15/90, Četvorka i Bingo Joker putem interneta propisani su Procedurom o uplati igara na sreću putem interneta.

Uplate za učestvovanje u igrama TV Tombola Bingo 15/90, Četvorka i Bingo Joker putem interneta primaju se isključivo na internet stranici Priređivača, odabirom ponuđenih opcija za odigravanje i potvrdom uplate igre.

Pri uplati igara TV Tombola Bingo 15/90, Četvorka i Bingo Joker putem interneta, igraču su na raspolaganju opcije odabira odigravanja jednog ili više listića.

#### **Član 51.**

Elektronska potvrda (E-potvrda) je elektronski zapis potvrde o uplati koja se nalazi na elektronskom računu igrača u centralnom sistemu Priređivača. E-potvrda je isključivi dokaz za učestvovanje u igri onih igrača koji u istoj učestvuju putem interneta. E-potvrda učestvuje u onom kolu igre za koje je njen kompjuterski ispis zapisan na optičkom mediju.

#### **Član 52.**

Za uplate putem interneta, igrač mora izvršiti potvrdu željene transakcije. Jednom izvršena transakcija uplate ne može se poništiti.

Za uplatu primljenu putem interneta:

- isplata svih dobitaka evidentira se na elektronskom računu igrača početkom isplate za pojedini dobitak;
- dobitak se umanjuje za iznos poreza na dobitke prije isplate na elektronski račun ukoliko isti podliježe tom porezu.

### **9. NAČIN, POSTUPAK I NADZOR IZVLAČENJA, ODNOSNO UTVRĐIVANJA DOBITAKA**

#### **Izvlačenje dobitaka**

#### **Član 53.**

Javno izvlačenje u igrama TV Tombola Bingo 15/90, Četvorka i Bingo Joker nadzirat će Komisija za izvlačenje brojeva. Komisija se sastoji od tri člana od kojih je jedan član predstavnik Ministarstva finansija Federacije Bosne i Hercegovine.

Rad Komisije se utvrđuje posebnim Uputstvom koje donosi Priređivač.

Tehnikom izvlačenja brojeva rukuje ovlaštena osoba Priređivača, na osnovu Uputstva direktora.

#### **Član 54.**

U toku izvlačenja dobitaka vodi se zapisnik kojeg svi članovi Komisije potpisuju. Zapisnik mora sadržavati: mjesto, vrijeme, način izvlačenja dobitaka, uplatu u tom kolu, izvučene dobitne brojeve.

Zapisnik o izvlačenju Priređivač dostavlja Ministarstvu finansija Federacije Bosne i Hercegovine u roku od sedam dana.

#### **Utvrđivanje dobitaka**

#### **Član 55.**

Dobitke, utvrđuje Priređivač a potvrđuje Komisija za utvrđivanje dobitaka u sastavu od najmanje tri člana. Članove Komisije imenuje Priređivač.

Rad Komisije za utvrđivanje dobitaka se utvrđuje posebnim Uputstvom, koje donosi Priređivač.



## **10. NAČIN OBJAVLJIVANJA IZNOSA UPLATE, FONDA DOBITAKA I REZULTATA IGARA**

### **Član 56.**

Izvještaj o uplati i fondu dobitaka pojedinog kola igara objavljuju se prije početka samog izvlačenja u direktnom TV prenosu.

Privremeni izvještaji o dobitcima u tekućem kolu objavljuju se nakon javnog izvlačenja a toku direktnog TV prenosa.

### **Član 57.**

Privremeni izvještaj koji se objavljuje u jednoj od dnevnih novina sadrži najmanje ove podatke:

- redni broj kola;
- datum izvlačenja;
- izvučene brojeve po redosljedju izvlačenja;
- broj dobitaka i iznos dobitaka po vrstama;
- iznos primljene uplate;
- nagradni fond;
- iznos fonda određen za pojedine vrste dobitaka;
- rok za prigovore;
- ostala obavještenja koja su potrebna igračima.

## **11. PRIGOVORI - REKLAMACIJE**

### **Član 58.**

Igrač može podnijeti prigovor Komisiji za utvrđivanje dobitaka u roku od četiri dana od dana objavljivanja privremenog izvještaja, a u skladu sa Procedurom za reklamacije.

### **Član 59.**

Konačni izvještaj koji se objavljuje u jednoj od dnevnih novina sadrži najmanje ove podatke:

- redni broj kola i datum izvlačenja;
- iznos uplate i fond dobitaka;
- broj i iznos dobitaka;
- rok zastare isplate dobitka;
- uplatne brojeve potvrda opravdanih i neopravdanih prigovora;
- ispravke eventualnih greški predhodnog kola.

Konačni izvještaj potpisuje direktor Priredivača.

Privremeni i konačni izvještaj objavljuju se u jednom od sredstava javnog informisanja.

## **12. NAČIN I ROK ISPLATE DOBITAKA**

### **Član 60.**

Isplata dobitaka JackPot; Bingo; dobitak I vrste u igri Četvorka, kao i svih vrsta dobitaka čija je vrijednost preko 5.000,00 KM obavlja se po konačnom izvještaju u sjedištu Priređivača.

Isplata ostalih vrsta dobitaka čija je vrijednost do 5.000,00 KM obavlja se po Privremenom izvještaju, na prodajnim mjestima Priređivača.

Isplata dobitaka u igri igrač-gost „Šansa više“ isplaćuje se na tekući račun u roku od pet dana od dana izvlačenja.

Ukoliko dobitnik ima više vrsta dobitaka u igrama TV Tombola Bingo 15/90, Četvorka i Bingo Joker i igri igrač-gost „Šansa više“, isplata dobitaka vrši se istovremeno, na isti način kao u stavu 3. ovog člana.

### **Član 61.**

Pri isplati dobitka igrač je dužan predati u ispravnom stanju potvrdu.

Ispravna potvrda je ona koja sadrži sve elemente navedene u članu 47. ovih pravila.

Uz predaju potvrde igrač je dužan predati na uvid ličnu ispravu osobi koja obavlja isplatu, ako se radi o oporezivom dobitku.

### **Rok isplate**

### **Član 62.**

Isplata dobitaka zastarijeva u roku od 30 dana od dana objavljivanja konačnog izvještaja.

### **Neisplaćeni dobici**

### **Član 63.**

Nakon isteka roka iz člana 62. ovih pravila, neisplaćeni dobici se u skladu sa članom 39. Zakona o igrama na sreću prenose u fond neisplaćenih dobitaka.

## **13. NAČIN UPOZNAVANJA IGRAČA SA OVIM PRAVILIMA**

### **Član 64.**

Ova pravila će se objaviti u jednoj od dnevnih novina.

### **Član 65.**

Ova pravila nalaze se na svim prodajnim mjestima Priređivača i web stranici Priređivača.

Priređivač je dužan omogućiti igračima upoznavanje sa ovim pravilima, odnosno dati ih na uvid.

## **14. POSTUPAK U SLUČAJU OTKAZIVANJA IZVLAČENJA**

### **Član 66.**

Termin direktnog izvlačenja može se promijeniti.

Priredivač može, saglasno sa članom 35. Zakona o igrama na sreću, iz opravdanih razloga otkazati zakazano izvlačenje.

## **15. KRAJNI ROK UPLATE ZA UČESTVOVANJE U IGRAMA**

### **Član 67.**

Uplate za učestvovanje u igrama primaju se do roka koji određuje Priredivač.

## **16. POREZ NA DOBITKE**

### **Član 68.**

Fizička lica, koja su ostvarila dobitak od igara na sreću, plaćaju porez u skladu sa Zakonom.

## **17. PRIJELAZNE I ZAVRŠNE ODREDBE**

### **Član 69.**

Priredivač je dužan čuvati zapise potvrda na neizbrisivom optičkom disku (DVD) najmanje dvije godine računajući od dana održanog izvlačenja određenog kola, osim u slučaju kada je pokrenut sudski spor radi ostvarivanja prava iz učešća u igri TV Tombola Bingo 15/90, Četvorka i Bingo Joker, te se tada zapisnici čuvaju do pravosnažnosti sudske odluke.

### **Član 70.**

Za rješavanje sporova koji proisteknu iz učestvovanja u igri TV Tombola Bingo, Četvorka i Bingo Joker mjesno i stvarno je nadležan Općinski sud u Sarajevu.

### **Član 71.**

Stupanjem na snagu ovih pravila prestaju da važe Pravila igara na sreću TV Tombola Bingo, Bingo Plus i Bingo Joker, br. 01-40-2790-5/19 od 18.09.2019.godine i Pravila o izmjenama Pravila igara na sreću TV Tombola Bingo, Bingo Plus i Bingo Joker, br. 01-45-868-2/20 od 19.03.2020. godine i br. 01-3-3162-3/20 od 29.09.2020. godine.

## Član 72.

Ova pravila stupaju na snagu i primjenjuju se narednog dana od dana objavljivanja u jednoj od dnevnih novina.

Broj: 01-8-1853-3/21.  
Dana: 11.10.2021. godine

**P R E D S J E D N I K**

**Miroslav Ćorić, s.r.**